

武溪集

附余襄公奏議

郝魯題



武溪集卷第五

工部尚書充集賢院學士贈尚書左僕射累贈
少師謚襄公余靖

記上

大宋平蠻碑

大宋平蠻京觀誌

韶州新置永通監記

海州社稷壇記

同遊泐溪石室記

韶亭記

湧泉亭記

韶州新脩望京樓

韶州貢水館記

韶州新脩州衙記

大宋平蠻碑

聖宋體天法道欽文聰武聖神孝德皇帝在宥之三
十一年天宇之內海渚之外氍裘卉服罔不率俾粵
五月蠻賊儂智高寇邕州陷其郭賊霄衣冠驅虜稚
艾遂沿鬱江東下所過郡縣素無壁壘倏然寇至吏
民棄走因得焚蕩剽鈔無所畏憚乃攻圍廣州五十
餘日不克大掠其民而去然所存者官舍倉庫而已
百年生聚異域珍玩掃地無遺矣國家於嶺南不宿
重兵故賊起三月而後師集蔣階張忠素號驍將相
繼覆沒由是畏懦者望風潰走賊鋒益熾逼連賀毀
昭賓再穴干邕矣驛騎繼聞上甚憂之樞密副使狄

公青以爲將帥之任古難其才若再命偏裨事一不
集則二廣之地禍連而不解矣亟自請行天子聽之
遂改宣徽南院使荆湖南北路宣撫使都大提舉廣
南東西路經制盜賊事九月拜命旣授禁旅仍啓以
舊鎮騎兵荆湖銳卒從行十二月至桂林督部伍親
金鼓然後兵知節制矣明年正月甲辰至賓州先是
鈐轄陳曙領步兵八千潰于崑崙之關公推其罪首
斬曙及佐吏已下三十一人然後人知賞罰矣兵將
股慄咸思用命是月已來引師至邕城一舍賊悉其
徒以逆戰公之行師雖倉卒道途皆有行列賊至駐

先鋒以接之公憑高望擣騎兵以翼焉賊徒大敗追奔十五里斬首二千二百餘級生擒五百人尸甲如山積于道路僞署將相死者五十七人是夕智高焚營自遁復入于蠻中先是命湖南江西路安撫使樞密直學士孫沔入內押班石全彬過嶺與廣西經略使余靖同其經制東西路賊盜故命公督大提舉然孫石贊謀而軍中悉稟公之節制賊之再據邕也農者輟耕商者輟行遠邇惶惶不聊其生及公之拜命也朝野之論中外歡然以方召之才兼機軸之重出剪狂蠻無噍類矣賊之巢穴曰廣源州交趾之附庸也

父爲交趾所戮遂棄其州奔南蠻界中淵數恃傲以
僭稱號自名其居曰雲南道各南天國再名其年曰
景瑞曰啓曆雜名其左右之人自侍中開府已下署
之其主謀者黃師宓儂廷侯儂志忠等戰沒於陣未
有剪其羽翼而能飛剗其腹心而能全者也故宵遁
矣嗚呼智高之謀十餘年間招納亡叛共圖舉事十
餘月間連破十二郡所向無前夫豈自知破碎奔走
在於頃刻之間乃知名將攻取真自有體哉二月甲
戌改乘轅其月丁亥至桂州詔徙護國軍節度復以
樞密副使召仍曲赦嶺南民得休息矣遂磨桂林之

崖石以書其勲其詞曰

有宋之大	天覆地載	四海正朔	百蠻冠帶
蠢茲枉寇	起乎徼外	父戮于交	逃死獠界
招納亡命	浸淫邊害	邊臣罔上	習尚以懈
卒陷邕郭	乘流東邁	志圖全越	肆其蜂蠆
廣城言言	梯衝附焉	攻之五旬	掠民而旋
賊鋒一至	千里無烟	還據于邕	五嶺騷然
天生狄公	輔聖推忠	情存義烈	志嫉頑兇
請纓即路	仗節臨戎	英材薈集	猛將風從
賊之敢鬪	實惟天誘	來迂于郊	奄喪群醜

當我摧鋒

易如拉朽

僭補偽署

叢然授首

羽翼既剪

心腹既剗

雖欲自舉

人誰與圖

焚廬而去

回巢以遁

六親不保

曰獻其俘

厥惟邕邊

南國之紀

九洞襟帶

列城唇齒

險固一失

兵糧無峙

庶民患蚩

鳥驚獸駭

我公之來

電掃雲關

叛渙斗破

綱領重恢

師成廟筭

民得春臺

天聲遠振

繫公之材

大宋平蠻京觀誌并序

大宋皇祐四年夏五月廣源州蠻犯邕管陷之乘江
流暴漲東陷九城遂至廣州廣人怯戰登陴自固賊

得駐兵傳城攻之五旬雲梯土山極肆其巧城堅不能下乃還經途復殘二郡覆四將再入干邕凡害將佐三十餘負虜生口萬計牛畜資寶無筭所過焚蕩無餘楚越蕭然矣朝廷憂之君臣爲之旰食樞密副使狄公青抗章請行願授成筭上重其誠從之先是命樞密直學士孫沔入內押班石全彬同本路經略使余靖經制賊盜命青以宣徽使都大提舉總其節制明年正月己未青帥三將兵至邕州歸仁鋪賊舉衆出城拒戰大敗之騎兵追奔十五里所殺蠻衆二千二百餘人僞署侍郎黃師宓等腹心將領五十七

人死于陣賊首儂智高其夜焚城自遁詰朝引兵入
城俾供奉官賈榮就戰場斂賊尸而殓之爲塚于歸
仁之南又遣柳縣尉區有鄰聚重傷還城而死并活
擒而戮及奔而蹂踐燔灼者復三千二百二十八人
爲一塚瘞之于城之北二月有詔即其築爲京觀乃
命立石以誌其伐銘曰

庸臣司邊

率職不虔

盜起其間

蠢爾異類

藏亡納叛

以輔狡頑

窺茲無備

乘虛襲怠

遂肆兇姦

順流而東

列城皆空

嶺表騷然

師徒桓桓

矢勁摧完

天下惻焉

帝命樞臣

握節屬韉

拯隆綏殘

師行之律

賞罰貴必

其謀乃專

兵家之勢

動靜有制

所擊無堅

于嗟群醜

徂於常勝

敢當其前

驅彼犬羊

敵此熊羆

血膏于原

棄甲如山

遺骸亘野

百里腥羶

武功外揚

仁心內憫

念及幽泉

肩髀之葬

京觀之封

銅柱齊年

天聲遠振

皇澤重宣

永鎮群蠻

韶州新置永通監記

古之建國者義以制事材以聚人八政之先曰食與
貨即山鼓鑄三代而然禹鑄歷山之金以禦水禍湯

造莊山之幣以極旱虐周以金錫之利分隸虞衡唐
以柳桂之郡並建鑪冶貨之所產本無定處鑄造之謀
期於便事而已國家平一諸夏寵綏四海開寶興國
之際收復江閩因其故區作爲泉布時移歲積地產
靡常比年已來治民幾廢焉今天子嗣位之二十七
年特詔翰林學士葉公清臣宋公祁經度山澤之禁
以資國用乃僉作奏曰謹校郡國產銅和市之數惟
韶爲多而夔處嶺阨由江淮資本錢以酬其直實爲
迫遠謂宜即韶置監分遣金工以往模之歲用銅百
萬斤可得成幣三百萬三分其一以上供餘復市銅

幾得二百萬如是則其息無窮矣詔下其議於廣東
于時轉運使直太史傳公某知韶州比曹副郎樂公
某協恭承詔以經厥始郡有故堞號爲西州遺趾高
平宛出郭外乃相厥土墨則食焉凡棟宇之制管庫
之嚴詢于故實斷以心匠模沙冶金分作有八刀錯
水鑒離局爲二並列關鑰互有隄防當其中局控以
廳事誰何警察目無逃形其鈇錯之備用薪炭之兼
蓄別藏異室布于兩序出內謹密前爲大閑治官列
署于閑之南群工屯營于垣之外市材于山市甃于
陶雇工于巧凡手指之勤筋力之用率平價而與之

金不發帑貲不徭民籍而功用成爲屋八百楹最材
竹鐵石陶旄之用一百四十萬惟材木六千資于連
山釘口十萬出自真陽餘悉辦于韶之境而民不知
役乃知循良之政誠自有體哉以皇祐冠年龍集己
丑三月甲午始築其基而飭其材八月辛酉棟宇完
範鎔備物有區工有居九月己亥大合樂以落之董
舊巧募新習勗怠勵惰綬以程準日課千緡不愆于
素初郡之銅山五歲共市七萬前太守潘君一歲市
百萬及欒公繼之乃市三百萬明年又差倍之歲運
羨銅三百萬以贍嶺北諸冶苟非主計者通其神提

網者揚其職守土者宣其力則何以協規矧模成効
之速如是哉且韶被山帶海雜產五金四方之人棄
農畝持兵器慕利而至者不暇十萬窮則公剽怒則
私鬪輕生抵禁亡所忌憚緩其羈紲則鷹摯而陸梁
急其銜勒則獸駭而踦齧故境壤雖狹而獄犴寇抄
常倍他境必資威肅惠和兼被于物乃成善政觀此
圖功賦事精至詳簡則民之受賜其可知矣初以遠
方置監議者不一故朝廷有以待之明年四月乃下
敕賜名永通時天子親享明堂之歲五月記

海州社稷壇記

古之言社稷者其尊與宗廟等諸侯始封授以茅土
歸其國而立社上以尊天子之命下以教民美報也
漢制郡縣置社太守令長侍祠牲用羊著于祠令則
知郡國雖異而祀事無改春求秋賽未之廢也東海
郡社稷舊壇貌在孤山之麓地形險迫儀度草略素
亡壇壝高卑之式絕無畛域外內之限牛羊所踐芻
牧弗禁慢神瀆禮闕莫甚焉范陽祖君擇之慶曆戊
子由蘭臺丞佩郡印既下車之三月以爲群神之在
祀典者衆矣惟社稷得用籩豆奠饗幣以脩萬民之
報而祠所弗嚴何以示教乃相美土改而築之去舊

趾五十步得平壤焉廣輪數畝命以官田易之封土
爲壇陞降有陛龍臺今據古一本於禮樹以所宜之木
敞以門墻奉祠執事者齋有宮侍有次又閱章聖皇
帝所頒崇器制度未如制者咸俾新之於是政禮具
舉人祇交感風雨以時田穀順成秋八月行事于新
壇以報神福民心熙熙覘盛儀而樂嘉應也於戲擇
之以通材遠識屈在外補觀其臨民賦政先於典禮
得古君子之風焉脩淫祀以求庇者得不愧乎督役
者朐山令李良輔云

同遊泐溪石室記